


www.BibleForChildren.org



Xhun 14



Ye'vaqetz kuxh xaon etitz'ab'al, pet k'uqb'avaqXH ek'uul ti' vinB'aal. Tul k'uqb'avaqXH ek'uul s-vi'.
Tan mamala atib'al at tal uva' atil vinB'aal. Pet ye'l koq inq'a atib'al, tul tiraetz vale sete uva': «Ye'l atib'al ati,» chaqich in sete. Pet ma't in ti' tilix inuqul vetatib'al.



Toqetz b'enoq in ti' ib'anax inuqul vetatib'al, tul
tetxhal la' ul in inpaqte. Tul la' ul viq'o ex s-vi'. Tan
tal uva' la' atink in, tul antetzxh uva'e la' atink ex.



In Xhun, vemol s-niman tetz Jesus, eche etitz'in
etatzik. In, uva' tzum nik inpal titza'lal setuch'.
Atz tzum nik ib'ant quB'aal Tiuxh



iq'esalil t-qaanima
setuch'.




Atz tzum nik qukotx't quvatz setuch', eche uva'
ikotx't JesuKriisto ivatz. Tan pereexhoich in tu
tx'ava' Paatmos, uva' sib' at oka'p tuul u



maar, ti' vinpaxsat
viyolb'al quB'aal
Tiuxh ti' inq'a
b'a'nla txhaq yol ti'
JesuKriisto.



Iletz kuxh inq'a yol nikich tal s-ve, tul ajtxh innatxh eenich vet in tu amlika' ta'n viTiuxhil Tiuxh. Tul vil val u k'uqe'vb'al atich tuul u amlika', tetz mam iq'esal uva' at tigle'm. Tul k'uqlich ku' quB'aal Tiuxh s-tuul. Tul nikich ib'an viq'esalil.




Ya'ne vab'i iyolon jank'al inq'a motx iviinixsa ka
quB'aal Tiuxh, inq'a at tu amlika' tuch' inq'a at
vatz u tx'ava' tuch' inq'a jaq' u
tx'ava', atz tuch'at inq'a at tuul
u maar. Tul ech motx tal s-eche:
—Qunatxhk'uula Tiuxh, uva'
k'uqlel tu k'uqe'vb'al tetz iqle'm.




Atz qunatxhk'uula JesuKriisto, uva' ech tilix, eche
chelem karne'l. Tul la' aq'ax b'en s-nim. Tul la'
oksal iq'ij. Tul niimxh tatin
b'enames. Tul at ticle'm tiib'a
jank'al s-kaqaayil s-txheel, atz
tinjattant inq'a ya'b' uva' b'ena'l
kuxh ib'en toq tule',
—chichichage.




Ya'ne vil iku'l u ak'la tenam Jerusaleen tu amlika',
uva' quB'aal Tiuxh txhaqon tzaan, u ch'exichla tenam.
Tul tira josq'ilichxhtu'. Tan echichxh vet iviqix u
ak'la tenam Jerusaleen, eche iviqix va'q ixvaak uva'
toqna'q tz'alongoq vet tuch' itzumel.




Ya'ne vab'i val u qul uva', a'ich ixhaakalil tel tzaan
k'atz u k'uqe'vb'al tetz igle'm. Tul ech tal s-eche: —
Il vet u tatib'al quB'aal Tiuxh koya'p xo'l inq'a xaol.
Tul toq atinoq vet quB'aal Tiuxh s-xo'l. Tul itenam
vet quB'aal Tiuxh inq'a xaol toq ib'ane'. Tul ta'nxx
vet quB'aal
Tiuxh, iTiuxh
inq'a xaol toq
ib'ane'.



Ya'ne ik'utxh u aanxel val u txilkin xaomla a' s-ve
uva' tira ye'l inva'q tz'il atich s-xe', val u xaomla a',
uva' la' aq'on q'ij isaq inq'a xaol k'atz quB'aal Tiuxh.
Tul oqxhich txilkin tilix u xaomla a'e, eche tilix inva'q
kristaal. Tul a' nikich elk tzaan u xaomla a' tal uva'
k'uqlich quB'aal Tiuxh, atz tal uva' k'uqlich
JesuKriisto, uva' ech tilix, eche chelem karne'l.



Tul ye'l vet q'ij, atz ye'l vet ich' nikich isa'on s-te ti' itxiqule', tan a' vet vilitz'kab'in u tatin quB'aal Tiuxh tuch' JesuKriisto, uva' ech tilix, eche chelem karne'l, nikich txiqun u mam tenam.



Pet ye'l inva'q xaol uva' b'anol tetz pa'v la' palo'k tu mam tenam. Atz ye'l inva'q b'anol tetz txoqeb'al k'uul la' palo'k tu mam tenam.

Atz ye'l inva'q tz'eqol tzij la' palo'k tu mam tenam.


Pet ta'n kuxh la' motx palo'k tu mam tenam

k'atz quB'aal Tiuxh inq'a xaol, inq'a at q'ij

isaq k'atz quB'aal Tiuxh, inq'a tz'ib'amal

ib'ij tu u' tal uva' tz'ib'amal vib'ij inq'a


niman tetz JesuKriisto, uva' ech tilix, eche chelem karne'l.




Tul tira ye'l vet b'eeq oq'el tuch' txumu'm toq ib'an
inq'a xaol ta'n quB'aal Tiuxh. Tul tira ye'l vet ta'l
ivatz la' motx eli. Tul ye'l vet kamchil la' ib'an s-xo'l.
Atz ye'l vet txumu'm. Atz ye'xhkam
vet va'q k'axb'ichil la' sich'insan.
Atz ye'l vet txho'm la' b'anon.
Tan qat pay vet ka jank'al inq'a
itza'lal uva' nikich motx palk
tuulb'al u q'ij isaq vatz tx'ava',
—xe't u qul uva' vab'i.




Tul ye'l vet inpaqt la' tal quB'aal Tiuxh yaab'la yol ti'
inva'to'q kam. Tan a' vet quB'aal Tiuxh tuch'
JesuKriisto, uva' ech tilix, eche chelem karne'l, la'
motx atin t-vik'uqe'vb'al tetz tiqle'm xo'l u mam
tenam ti' ib'ant
viq'esalil. Tul la'
natxhk'uulal vet
ta'n jank'al inq'a
taq'onvil, vinaq
s-ixoq.




Tul tira la' motx til vet ivatz u quB'aal Tiuxh. Tul tz'ib'amal vet ok ib'ij u quB'aal Tiuxh tipala inq'a niman tetz la' ib'ana.




Ya'ne vil inq'a ye' niman Jesus, inq'a kamna'qich
vete', k'uxh at ticle'm, atz k'uxh ye'l ticle'm;
txaklichaq vet ok vatz quB'aal Tiuxh uva' k'uqlich tu
k'uqe'vb'al tetz iqle'm. Tul motx jaqp vet inq'a u',
inq'a tz'ib'amich kam vib'ano'm inq'a xaol
s-tuul, inq'a ma'tich ikame'. Atz jaqpat
va't u u' tal uva' tz'ib'amal vet
ib'ij inq'a xaol s-tuul uva' at
q'ij isaq k'atz
quB'aal Tiuxh,
inq'a motx itz'e'v vet
inpaqte, inq'a ma'tich
ikam vet tzitza vatz
u tx'ava'.




Tul taq' vet ku' quB'aal Tiuxh yol tinuqul ti' kam
vib'ano'm tz'ib'amiche. Echetz tilix vete ja'l uva' ye'l
ib'ij atich tuul u u' tetz q'ij saq vatz quB'aal Tiuxh,
tul lumimal ipal vet ku' tuul u xamal uva', eche na'b'
tilixe'. A'etz vet vika'v kamchile vatz
quB'aal Tiuxh. Ya'ne el vet iq'ij u
kamchil tuch' u tatib'al kamna'q.
Tan lumil vet b'en
tuul u xamal uva',
eche na'b' tilixe'.



Tul ech nik tal viTiuxhil Tiuxh tuch' inq'a niman tetz
Jesus s-eche: —iAvul vete'! —chiche, eche nik tal
va'q chelem ixvaak te u chelem xaak. Ja'letz uva' nik
ab'in, tul: —Avul vete', —chaqatetza.



Echetz ja'l uva' nik sa'on q'ij isaq uva' ye'l iya'eb'al
imotxeb'al, tul okoq b'en ti' quB'aal Tiuxh, eche va'q
xaol uva' nik ikam tzaqa tzi'il. Tan a' quB'aal Tiuxh
la' aq'on q'ij isaq uva' jit txhoel la' ib'ana. Tan a'
Tiuxhe vixe'al u q'ij saq, eche va'q titz'eb'al a'.



Tan sib'xh taanima quB'aal Tiuxh ti'
jank'al inq'a xaol vatz tx'ava'. Tan
a' isa' ye' la' itz'eqx inq'a xaol.
Pet at q'ij isaq uva' ye'l
iya'eb'al imotxeb'al
la' ib'ana.



Xa'tetze qat taq' tzaan in, in
viK'aol ti' ul vaq't vib' kamoq ti'
itxhoox jank'al vipa'v inq'a
xaol, in, uva' ta'nxxh in
sib' viqle'm.



Romaanos 3:23

Tan jank'al inq'a xaol, tan va'l kuxh motx ipa'vin s-kaqaayil. Tul tira ye' motx itx'ol topoon ti' tiq'ol viyolb'al quB'aal Tiuxh s-b'a'n, eche uva' itz'amich s-ti' ta'n quB'aal Tiuxh.

Romaanos 6:23

Tan oq a' u pa'v la' b'anaxi, tul kamchil b'en taq' vatz quB'aal Tiuxh. Pet vib'a'nil u quB'aal Tiuxh uva' nik toya, tan q'ij saq uva' ye'l iya'eb'al imotxeb'al b'en taq' ti' inimal u quB'aal JesuKriisto.

Evreeos 9:27

Tul echat kuxh ib'an quB'aal JesuKriisto, eche uva' b'ek'el ka ta'n quB'aal Tiuxh, ti' uva' paqul kuxh la' kam u xaol, tul xamtel la' aq'ax vet ku' yol tinuqul s-ti'.



Efeesios 2:8,9

Tan a' vib'a'nil quB'aal Tiuxh qat chiton ex, tan qat egej vet u quB'aal JesuKriisto. Jitetz ti' eb'ano'm tul qat ichitvat ex, pet yiqxh qat tzaj u b'a'nil t-taanima. Tul qat ichit ex. Echetz ye'xhab'il la' toksa iq'ij. Tan jit ti' ib'ano'm va'q xaol qat chitonka.

Romaanos 10:9,10

A'etz inq'a yole inq'aa: Tan ja'l uva' la' alon uva': —A' Jesuuse vinB'aal, —chage, tul la' tzaj t-taanima vigejexe' uva', a' u quB'aal Tiuxh itz'e'vsan u quB'aal JesuKriisto, k'uxh ma'tich ikam vete', tul chiteletz vet ti' ye' ib'en tu k'axk'o ti' inq'a ipa'v la' ib'ana. Tan oq tavaanimaxh la' tzajk vigeex u quB'aal JesuKriisto, tul jitetz vet axh aj pa'vome vatz quB'aal Tiuxh la' ib'ana. Atz ti' aalt vatz tenam tuch' vatzi' uva', a' Jesuuse vaB'aal, tul chiteletz vet axh ti' ye' ab'en tu k'axk'o ti' inq'a apa'v.



Xhun 3:16,17

Tan sib'xh taanima quB'aal Tiuxh ti' jank'al inq'a xaol vatz tx'ava'. Tan a' isa' ye' la' itz'eqx inq'a xaol. Pet at q'ij isaq uva' ye'l iya'eb'al imotxeb'al la' ib'ana. Xa'tetze qat taq' tzaan in, in viK'aol ti' ul vaq't vib' kamoq ti' itxhoox jank'al vipa'v inq'a xaol, in, uva' ta'nxxh in sib' vikle'm. Qatetz itxhaq tzaan in quB'aal Tiuxh, in viK'aol. Poro jit a' qat itxhaqvatz tzaan in ti' taq'ax ja'p u yol tiib'a jank'al inq'a xaol ti' ik'axb'isale', pet, ti' uva', jank'al inq'a xaol la' ikol tib' vatz u k'axk'o ti' inq'a ipa'v.



1 Xhun 5:11-13

Tul a'etz viyol quB'aal Tiuxhe uva'a: Tan qat taq' quB'aal Tiuxh q'ij qusaq uva' ye'l iya'eb'al imotxeb'al, o' inq'a nik qeon viK'aol quB'aal Tiuxh. Tul atetz vet q'ij qusaq uva' ye'l iya'eb'al imotxeb'al, tan, ti' uva' at vet qatin tuch' viK'aol. Echetz ja'l uva' at vet tatin tuch' viK'aol quB'aal Tiuxh, atetz vet q'ij isaqe uva' ye'l iya'eb'al imotxeb'al. Pet ja'l uva' ye'l tatin tuch' viK'aol quB'aal Tiuxh, ye'letz q'ij isaqe uva' ye'l iya'eb'al imotxeb'al. Qatetz intz'ib'a b'en inq'a yol sete, ex inq'a nik qeon uva' at tiqle'm quB'aal JesuKriisto ta'n quB'aal Tiuxh. Echetz la' etootzaqite uva' at q'ij esaq uva' ye'l iya'eb'al imotxeb'al.



Xhun 14; 2 Koriintios 5; Apokaliipsis 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Ixil, Chajul Bible (ixl) © 2016, Wycliffe Bible
Translators, Inc. All rights reserved.

<https://live.bible.is/bible/IXLCWBT/MAT/1>

©2024 Bible for Children, Inc.

www.M1914.org

www.bibleforchildren.org

